



Inatsisartunut ilaasortaq
Aleqa Hammond
Siumut

Suliffeqarfinni sulisunik biileqartitsinermut atatillugu biilit qatserisartunit, politiinit peqqinnissaqarfimmilu sulisunit atorneqarnerinik akileraarusii-sarneq

Inatsisartut suleriaasianni § 36, imm. 1 innersuussutigalugu akileraarutininik nalunaaruteqarnissamut pisussaaffimmut tunngatillugu, qatserisartut, politiit peqqinnissaqarfimmilu sulisut pigaartuunerminni biilininik angerlaassinerminnut akileraarutininik akiliinnginnissaannik imaqartunik malittarisassat allannguuteqarsimanersut 30.juli 2009-mi apeqquaqarsimavutit

Aallaqqaasiullugu apeqquummut akissuteqarnerup kingusinnera ajuusaarutigaa.

Akeqanngitsumik biileqartitaanermut, tamatumani aamma biilinit qatserisartunit, politiinit imaluunniit peqqinnissaqarfimmi sulisunit atorneqartunut, akileraarusiisarnermut tunngasumik malittarisassat maannamut atuuttuusut allanngortinneqanngillat. Tamatumani aamma sulisitsisut akeqanngitsumik biilininik sulisunut atugassiinernik nalunaaruteqarnissamut pisussaaffiat pineqarluni.

Akeqanngitsumik biileqartitaaneq aningaasarsianit akileraarutit pillugit Inatsisartut inatsisaanni § 19-imi malittarisassat malillugit akileraaruserneqartarpoq. Imm. 8-mi aalajangersakkat naapertorlugit angerlarsimaffiup suliffiullu akornanni biilerneq, sulisup aggersarneqarsinnaalluni pigaartuunerup nalaani biili imminut tunngasumik allatigut atunngippagu, aammalu sulisitsisup sulisup aggersarneqarsinnaasutut pigaartuutilluni angerlarsimaffiup suliffiullu akornanni biilininik atuinissaanik allaganngorlugu pisussaaffilersimappagu, imminut tunngasumik atuinertut isigineqanngilaq. Aalajangersakkat oqaaseqaatitaanni sulinerneq atatillugu aggersarneqarneq akileraaruteqaataassanersoq akileraaruteqaataassannginnorsorluunniit arlalinnik assersuusiornikkut takussutissaqarpoq. Sulisup nalinginnaasumik sulinerup kingorna angerlarsimaffimminiinnissaa ilaatigut piumasaqaataavoq tassungalu atatillugu immikkut akissarsiaqartinneqassalluni, apeqquataatinnagu aggersarneqarnersoq aggersarneqannginnorsorluunniit. Assersuutigalugu kommunip qatserisartuni atorfeqartumut aggersarneqarsinnaalluni

3. september 2009
AN
Postboks 1037
3900 Nuuk
Oq/tel +299 34 50 00
Fax +299 32 46 14
oed@gh.gl
www.nanoq.gl

pigaartuuneranut atatillugu sulisup ikuallattoqarneranut atatillugu angerlarsimaffimminiit qatserisarfimmut ikuallaffiusumulluunniit atugassaanik biilimik atugassippagu, tamanna sulisumut akileraarusiissutigineqassanngilaq, kommunip tamanna allaganngorlugu piunasaqaatigisimappagu sulisullu aggersarneqarnermi piunasaqaatit naammassisimappagit.

Malittarisassap nassataraa ilaatigut qatserisartuni, politiini aammalu peqqinnissaqarfimmi sulisut inuiaqatigiinni qitiusumik suliassat arlaannik suliaqartilluni biilimik akeqanngitsumik atugassinneqarnerminni akileraaruserneqanngissinnaanerat.

Biilit pineqartut imminut tunngasutigut assersuutigalugu meeqqat meeqqueriviliaanneqarnerannut, pisiniarnermut, ilaqtutanut pulaarnermut assigisaannulluunniit atorneqarpata, akileraannginnissamut tunngavigisaaq peerutissaaq, taamaattoqartillugulu biilit nammineq pigisatuulli atorneqarsinnaallutik sulisunut aningaasatigut iluaqusersuutaassallutik.

Biilit suliamut naleqqussagaasutut sanaat, assersuutigalugu politiit biilii sulisumut atukkiunneqarpata, akileraartarnermi naleqartitaanera ”nalinginnaasumik” nalingata 50 procentianut apparneqassaaq. Akileraarusiinermi appaaneq biilit suliamut naleqqussagaasutut sanaat biilinit inunnik angallassissutitut sanaajusunit ilorrisimaarnannginnerunerannik patsiseqarpoq.

Sulisooq biilimik suliamut naleqqussagaasumik angerlarsimaffiup suliffeqarfiullu akornani taamaallaat atuinissamik allaganngorlugu pisussaaffilerneqarpat, akileraartarnermi ”nalinginnaasumik” nalingata 25 procentianut nalilerneqassaaq. Pineqartumi sulisup angerlarsimaffiup suliffiullu akornani assersuutigalugu bussinut ilaanermut aningaasartuuteqartannginneranut aningaasatigut ajunngitsorsiassartaa akileraaruserneqartarneranut aallaaviusarpoq.

Naalakkersuisut isumaqarput akileraartarnermi malittarisassat eqqartorneqartut ataatsimut isigalugit sulisitsisunut, sulisunut inuiaqatigiinnullu assigiinngitsutigut naleqqussagaasariaqartut.

Inussiarnersumik inuulluaqqusillunga

Palle Christiansen
Aningaasaqarnermut Naalakkersuisooq